

書叢本基學國

集翁放陸

(四)

著游陸

行發館書印務商

書叢本基學國

集翁放陸

(四)

著游陸

行發館書印務商

中華民國二十二年五月初版

(二〇四八四)

國學基
本叢書
陸放翁集四冊

每部定價大洋肆元

外埠酌加運費匯費

著 者 陸 游

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

版 翻
權 印
所 必
有 究

陸放翁集

劍南詩藁

卷第六十七

倚筇

老翁愈老欲安歸。歸臥稽山飽蕨薇。未免解牛逢肯綮。豈能相馬造精微。靈山有士拈花笑。闕里何人鼓瑟希。我亦倚筇桑竹下。白髭蕭颯滿斜暉。

薄暑

冲夏暑尙薄。孤村日尤長。僧坊初施浴。行路亦饋漿。老我絕人事。終日坐虛堂。南北兩松棚。細細吹清香。堂中無長物。獨置湘竹牀。我睡僕亦休。睡覺誰在傍。起坐拭兩臂。小山鬱蒼蒼。安得烏有生。俱老無何鄉。

晝寢

倦腕擎書忽墮前。心清無夢腹便便。丹成未要排雲去。且住人間作睡仙。

又

困隄芒羊一欠伸。頽然忽已墮紗巾。鼻端雷動君無怪。路熟華胥不問津。

睡起

睡起僂僂扇嬾搖。枕痕著面未全消。山丹石竹俱零落。孤蝶飛來伴寂寥。

又

蒲萄換葉欲成陰。歲月催人感慨深。安得門前無俗客。岸巾臨水聽蟬吟。

林間書意

三三兩兩市船回。水際柴門尚未開。垂綠笳梢風正惡。弄黃梅子雨初來。紅螺盃小傾花露。紫玉池深貯麝煤。領取林間閑富貴。向來誤計伴鄒枚。

又

小山草木一窗秋。團扇江山萬里愁。不讀狐書真僻學。未登鬼錄且閑遊。少隨官牒嗟無策。晚脫朝衫喜自由。半嶺嘯聲驚阮籍。要知天下有高流。

示子邁

吾家太傅後。衿佩盛青青。我忝殿諸老。汝能通一經。學先嚴詁訓。書要講聲形。夙夜常相勉。諸孫待典刑。

追涼小酌

綠樹暗魚梁。臨流追晚涼。持盃屬江月。散髮據胡牀。苦蕒醃齏美。菖蒲漬蜜香。醉來呼稚子。扶我上南塘。

暑夜泛舟

暑氣方然一鼎湯。聊呼艇子夜追涼。微風忽起髮根冷。闕月初升林影長。漸近場中聞笑語。卻從隄外看帆檣。超然自適君知否。身世從來付兩忘。

又

烈暑元知不可逃。天將清夜付吾曹。小舟行處浦風急。健鶻歸時山月高。愚智極知均腐骨。利名何啻一秋毫。等閑分得吳松水。安用并州快剪刀。

短歌行

冠一免。不可以復冠。門一杜。不可以復開。山林兀兀但俟死。臺省袞袞吁可哀。巨材倒壑亦已矣。萬牛欲挽真難哉。阿房銅人其重各千石。回首變化爲風埃。吾曹浮脆不自悟。乃欲冠劍常崔嵬。勸君飲勿用盃酌。但當手提北斗魁。挹乾東海見蓬萊。安用俛首爲低摧。

小江

細篋斜陽一片秋。數家茅屋小江頭。鷺聲遠入菰蘆夾。鳥陣斜飛蘭杜洲。暫住便成閑嘯詠。欲歸更復小遲留。老翁脚力猶能健。明日重來倚寺樓。

歸興

輕雷輾轆斷梅初。殘籬縱橫過笛餘。鄉語謂梅雨有雷爲斷梅。又謂笛出林爲過笛。飽有期程新買犢。睡無厭足久捐書。白蘋滿渚閑揮榜。綠樹連村獨跨驢。夏日儘長歸亦暮。水邊燈火已疎疎。

又

古道迢迢人跡稀。羸驂欹帽遠村歸。正看日暮羊牛下。又見月明烏鵲飛。僧院疎鐘出林岫。漁家微火耿窗扉。閑遊要是幽人事。草露從教溼短衣。

自春來數夢至閬中蒼溪驛五月十四日又夢作兩絕句記之

騎驢夜到蒼溪驛。正是猿啼月落時。三十五年如電掣。敗牆誰護舊題詩。

又

亭臯敗葉先秋實。城上驚烏半夜啼。自笑遠遊心未已。年來頻夢到蒼溪。

自嘲

長日淡無事。虛堂來遠風。愛眠從病塞。厭事嬾治聾。猫健翻憐鼠。庭荒不責童。爾來添目暗。又免送歸鴻。

又

身臥孤村日。年當大耋時。貧憂償酒券。嬾悔許僧碑。輸稅質耕犢。飯醫烹伏雌。勞生不須歎。隨事且支持。

雨霽

一雨洗炎蒸。危闌偶獨憑。涼颼生萃蔭。爽氣入鬢髻。庭下宵遊燐。盤中晝掃蠅。絕勝塵土裏。馬上嚼寒冰。

大雨

萬壑風聲遠。千林雨脚長。溝盈懸蠹竈。屋漏徙衣囊。未說豐年喜。先便永夜涼。清秋病小愈。起柅上瀟湘。

社飲

世上升沉一轆轤。古來成敗幾樗蒲。試看大醉稱賢相。始信常醒是鄙夫。淵明詩云。一士常獨醉。一夫終年醒。起舞非無垂白伴。暮歸仍有髭髥扶。卽今不乏丹青手。誰畫三山社飲圖。

采藥有感

兼葭記霜露。蟋蟀謹歲月。古人于物理。瑣細不敢忽。我少讀蒼雅。衰眊今白髮。中間嬰疾疾。過日常卒卒。

潤毛春可求。山藥秋可掘。雖云力探討。疑義未免闕。屏居朋友散。奧妙誰敢發。窮理已矣夫。置績當自罰。觀邸報感懷

六聖涵濡壽域民。老年肝膽尚輪囷。難求壯士白羽箭。且岸先生烏角巾。幽谷主盟猿鶴社。扁舟自適水雲身。卻看長劍空三歎。上蔡臨淮奏捷頻。

送子適至梅市而歸

梅市長隄愴別情。魯墟歸路當閑行。日沉菱浦看魚躍。煙合菰叢聞獺鳴。蘸水門扉初半掩。擁橋炬火已先迎。停橈無奈清愁得。獨倚闌干待月明。

述悶

披衣按壓罷。據榻欠伸餘。香爇翻心字。茶凝出草書。客稀門每閉。意悶髮重梳。賴有盆山樹。幽情得少摠。

幽居

謝病言歸一鹿車。短籬數掩護幽居。樹枝南畔有飛鵲。蓮葉東邊多戲魚。倦枕續成驚斷夢。斜風吹落讀殘書。興來偶曳枯筇出。父老逢迎卻未疎。

午暑

笛材織簟涼如水。霧縠縫幮薄若空。更著高安竹根枕。不妨專享北窗風。

舟過道士莊

江蘿芳杜滿沙汀。道士莊前酒半醒。上下風煙還竟日。往來魚鳥各忘形。歸人薄晚常爭渡。病葉先秋亦

自零興欲盡時猶小住。北村漁火看青燄。

晨興

晨興未櫛盥。扶杖並檐立。斷雲方東行。庭草露猶溼。朝飢神益爽。清虛自來入。可憐數雞雛。隨母啄遺粒。蝶殘蚬蜊喜。鼠腐鴟鴞集。吾當一洗之。漱泉開玉笈。

對酒

斷簡殘編不策助。東臯猶得肆微勤。榮枯一枕春來夢。聚散千山雨後雲。煙水幸堪供眼界。世緣何得累心君。牀頭小瓮今朝熟。撥置閑愁且一欣。

泛舟

水長芳洲沒。風生釣艇橫。偶尋東埭去。卻作北村行。宿鳥昏方定。流螢雨更明。歸來未覺晚。傳漏下重城。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空罍。

東軒

終日在東廂。閑消百刻香。一枰分黑白。雙硯列朱黃。荷氣侵簾馥。桐陰覆井涼。前知今夕夢。孤榜上瀟湘。

季夏雜興

蟻鬪知將雨。蟲鳴覺近秋。衰翁非愛酒。無計奈孤愁。

又

巉巖瘦驢嶺。莽莽老牛陂。嶺在施黔間。陂在汝州。四海均羈旅。何人感此詩。

又

熟睡一炊頃。清談數刻間。未言能近道。要得暫身閑。

又

疏泉澆藥壠。枕石聽松風。此樂慚專享。無因與客同。

夏夜暑毒不少解。起坐庭中。

窗間有螢過。枕上見星流。欲睡不堪熱。長歌起飯牛。

又

風從高樹下。蟲抱短莎鳴。小據胡牀坐。還扶拄杖行。

素飯

放翁年來不肉食。盤箸未免猶豪奢。松桂輒炊玉粒飯。醯醬自調銀色茄。時招林下二三子。氣壓城中千百家。緩步橫摩五經笥。風爐更試茶山茶。曾樂道近餽茶山茶。

老態自遣

似見不見目愈衰。欲墮不墮齒更危。誰令汝年八九十。常欲強健寧非癡。目昏大字亦可讀。齒搖猶能決濡肉。若知用短百無憂。此理正如夔一足。矇矓眊眊俱有味。笑侮莫聽傍人喙。但令孫曾能力耕。一飽不妨還美睡。

耒陽令曾君寄禾譜農器譜二書求詩

歐陽公譜西都花。蔡公亦記北苑茶。農功最大置不錄。如棄六藝崇百家。曾侯奮筆譜多稼。儋州讀罷深咨嗟。一篇秧馬傳海內。農器名數方萌芽。令君繼之筆何健。古今一一辨等差。我今八十歸抱耒。兩編入手喜莫涯。神農之學未可廢。坐使末俗漸浮華。

雨夜

羸軀對影愴餘齡。追念平時只自驚。夏木正濃桐葉墜。秋風未起草蟲鳴。蠹魚似是三生業。汗馬難希百世名。時王師方出塞。小雨迎涼何所作。北窗還對短燈檠。

柴門

寂莫柴門不徹扃。槐花細細糝空庭。晚梅摘得鹽供飮。濁酒沽來草塞瓶。病已廢耕拋襪襪。閑猶持釣愛咿咿。經旬莫恨無來客。交舊疎如欲旦星。

賽神

落日林間簫鼓聲。村村倒社祝西成。扶翁兒大兩髦髮。溉水渠成千耦耕。家受一廛修本業。鄉推三老主齊盟。日聞淮潁歸王化。要使新民識太平。

菖蒲

古礪生菖蒲。根瘦節蹙密。仙人教我服。刀匕蠲百疾。陽狂華陰市。顏朱髮如漆。歲久功當成。壽與天地畢。

又

菖蒲古上藥，結根已千年。聞之安期生，采服可以仙。斯人非世人，兩耳長垂肩。松下語未終，竦身上青天。迂拙

迂拙宜歸早，乘除得死遲。老稀朝市夢，窮足道途詩。譁世無它技，忘懷自一奇。故溪幽絕處，惟許白鷗知。

夏夜

六尺筇枝膝上橫，中庭岸幘聽鶯更。露零金掌漢宮曉，月度銀河秦塞明。菡萏晚花香未減，梧桐病葉墮無聲。關河又見新秋近，屈指流年一歎驚。

夏末野興

半世天涯倦遠遊，還鄉不減旅人愁。數聲相應鳩呼雨，一片初飛葉報秋。山塢風煙僧院路，河梁燈火酒家樓。絕知雪鬢宜蓑笠，分付貂蟬與黑頭。

又

漠漠川雲闔復開，天公試手挽秋回。參差小市林邊出，縹緲疎鐘雨外來。土塢飯香供晚餉，布帘字大賣新醅。歸舟自逐輕鷗去，不用城笳抵死催。

示子孫

茆屋惟須補漏穿，家人衣食亦隨緣。豈容一事相關白，已過傳家十二年。

夜雨

藩籬處處蔓牽牛，薏苡叢深稗穗抽。只道物生常茂遂，一宵風雨又成秋。

劇暑

六月暑方劇。喘汗不支持。逃之顧無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間棋。亦有出下策。買簟傾家貲。赤脚蹋增冰。此計又絕癡。我獨謂不然。願子少置思。方今詔書下。淮汴方出師。黃旗立幟門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茅茨。脫巾濯寒泉。臥起從其私。于此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

六月十夜風月佳甚起坐中庭有作

曼膚汗雨不勝揮。夜景泠然暫解圍。漱罷寒泉甘齒頰。夢回斜月入窗扉。荷翻小浦孤螢度。露溼危巢倦鶴歸。我亦馭風思遠適。岳陽樓上醉湘妃。

古井

道傍有古井。久廢無與汲。鄰里共浚之。寒泉稍來集。駕言欲漱濯。冀遠塵土襲。躊躇復棄去。綆短安能及。

菴中紀事用前輩韻

埽灑一菴躬。瑣細蓬戶朝昏手開閉。荒山斲藥須長錢。小竈煎茶便短缺。空中咄咄安用書。身外悠悠固難計。山僧野叟到卽留。麥飯葵羹貴能繼。久貧奴婢多散去。豈有跣足并椎髻。負薪長歌過此生。直疑身在鴻荒世。

急雨

觸熱支離老病增。忽看東北片雲興。疾雷載雨輸膏澤。茂樹生風洗鬱蒸。采藥喜逢畎下客。說詩曾對剡中僧。坐令身在羲皇上。繞坐何煩更設冰。

舍東追涼

驕陽收火傘。清露貯冰壺。海湧四更月。風生千頃蒲。歌狂忘老境。意豁失窮途。所恨朋儕盡。無人爲攬鬚。

酒藥

愁憑酒破除。病藉藥枝梧。焦革死已久。宋清今亦無。幽情寄魚鳥。小艇雜菰蒲。海上秋風早。懸知肺渴蘇。

六月十七日大暑殆不可過。然去伏盡秋初。皆不過數日。作此自遣。

赫日炎威豈易摧。火雲壓屋正崔嵬。嗜眠但喜蘄州簟。畏酒不禁河朔盃。人望息肩亭午過。天方悔禍素秋來。細思殘暑能多少。夜夜常占斗柄回。

急雨遽涼

急雨消殘暑。曠然天地秋。露螢矜熠熠。風葉送颼颼。涼簟惟添睡。明河不洗愁。流年又如此。隨處怯登樓。

縱遊深山隨所遇記之

行穿桺确度谿谿。路跨清溪一木斜。歷盡艱危到平地。壞垣欹屋兩三家。

又

山徑欹危細棧通。孤村小店夕陽紅。竹郎有廟臨江際。木客無家住箐中。

又

道逢山客東荆薪。口眼睢盱略似人。試問村名瞠不語。剗然長嘯上嶙峋。

又

古寺蕭蕭不見僧。飛甍滿屋老鳧鳴。空房終夜無燈火。斷木支門睡到明。

感中原舊事戲作

蜂兒園裏香塵細。燕子樓中寶瑟斜。惟有天知太平事。乞傾東海洗胡沙。

小涼

羸軀一夏困沉綿。不在林間卽水邊。高臥已忘浮世事。小涼漸近早秋天。桔槔軋軋鳴幽圃。舴艋遙遙入暮煙。餘日無多那諱得。逢人自笑說明年。

村居

人笑無才自笑狂。槿籬竹塢得深藏。自從病後辜風月。未免愁中讀老莊。行圃數畦秋菜長。泛溪十里晚荷香。叢書坐嬾無由續。且補忠州手錄方。

城東

出郭溶溶細縠波。平生此地幾經過。祭餘野廟啼烏樂。酒賤村墟醉叟多。亭午疎鐘離石佛。斂疎微雨泊曹娥。采蓮艇子愁衣溼。不爲人家惜綠荷。

初秋露坐作短歌

房星縱心星橫。斗牛闌干河漢明。青天露坐性所樂。不覺庭樹秋風生。秋風搖落君勿悲。明年花開還滿

枝。人生衰謝則已矣。寧復鬢髮童顏時。

池上

旋移吟榻並池橫。欲出柴門復懶行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋稼漸登識喜

門外新場滑似油。早禾已慶十分收。虹霓不隔郊原雨。螭蜚爭催巷陌秋。人樂風傳迎社鼓。路長水澦采蓮舟。老翁自笑無它事。欲隱牆東學僮牛。

野渡用前韻

十里平沙到渡頭。溪山合向畫圖收。老僧赴供袈裟古。醉叟行歌櫓棹秋。斷岸煙迷耕處草。孤村雨送釣時舟。龍泉不斷元無恨。莫放神光上斗牛。

秋後一日風雨

炎歊數日劇。蕩滌及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱖鱖魚。

感事

曾事高皇接雋遊。君恩天地若爲酬。濟時已負終身媿。謀已常從一笑休。在昔風塵馳廐置。卽今煙雨暗耕疇。孤愁欲豁寧無地。野店逢僧每小留。

久無客至戲作

瘦影支離雪鬢繁。頻年老病臥孤村。雍容那有客聯騎。剝啄尙無僧叩門。濁酒香浮新社瓮。晚瓜味敵故侯園。茅檐蓬戶風煙晚。小酌欣然對子孫。

乍涼

涼風蘇病骨。搖落起詩情。一病輒數日。幾詩終此生。招呼丹竈客。結束玉霄行。預想溪橋路。三更待月明。

閑趣

絕迹市朝外。結廬雲水間。心平詩淡泊。身退夢安閑。有酒旋尋伴。無門那說關。桐江故不遠。日暮趁潮還。

溪上

溪上秋來風露清。蕭然浴罷葛衣輕。看雲舒卷了窮達。見月虧盈知死生。老去關心惟藥裹。閑中消日付棋枰。故人書札頻相問。何日芒屨上赤城。

秋詞

東吳七月暑未艾。川雲忽興天晝晦。蔽空雨點弩發機。平地成渠屋穿背。早禾玉粒自天瀉。村北村南喧地確。大牲如阜酒如江。相喚龍祠作秋賽。

又

八月暑退涼風生。家家場中打稻聲。穗多粒飽三倍熟。車軸壓折人肩賴。常年縣符鬧如雨。道上卽今無吏行。鄉間老稚迭歌舞。竈釜日饜豬羊烹。

又